



## Aclaíocht i measc leanaí scoile na hÉireann

### HBSC (IOMPRÍOCHT SLÁINTE i LEANAÍ ag AOIS SCOILE) na hÉIREANN

2002

Bileog Fíricí Taighde 17

*Pauline Clerkin, Uasal, an Dr Kieran Walsh agus an Dr Saoirse Nic Gabhainn, an tIonad Léinn um Chothú Sláinte, OÉ Gaillimh*

#### Achoimre

Sa suirbhé a rinne HBSC na hÉireann, thug 47.0% de leanaí na hÉireann le fios go mbíonn siad i mbun aclaíochta ceithre bhabhta sa tseachtain nó níos minice (buachaillí 59.2%, cailíní 37.9%). Is laghdú é seo ar na figiúirí a léiríodh i suirbhé a rinneadh i 1998. Tá laghdú le sonrú i gcéatadán na leanaí a bhíonn i mbun aclaíochta ceithre bhabhta sa tseachtain nó níos minice de réir mar a théann siad in aois, ó 64.7% de bhuachaillí 10-11 bhliain d'aois agus 53.6% de chailíní 10-11 bhliain d'aois, go 51.3% de bhuachaillí 15-17 mbliana d'aois agus 26.0% de chailíní 15-17 mbliana d'aois. Is lú seans go mothaíonn leanaí a bhíonn i mbun aclaíochta ceithre bhabhta sa tseachtain nó níos minice faoi bhrú ag obair scoile agus is mó seans: nach mbíonn deacracht acu labhairt lena n-athair, go gcaitheann siad níos mó ná ceithre thrátnóna sa tseachtain lena gcairde agus go bhfuil sláinte an bhradáin agus go bhfuil siad an-sásta. Is é atá i gceist le haclaíocht sa bhileog fíricí seo ná leanaí a bhíonn i mbun aclaíochta ceithre bhabhta nó níos mó sa tseachtain, lasmuigh d'uaireanta scoile, go mbíonn saothar orthu agus go mbíonn siad as anáil agus ag cur allais dá bharr.


#### Cén fáth a gcuirtear béim ar an ábhar seo?

Tá baint ag gníomhaíocht choirp le sláinte shóisialta, shíceolaíoch agus fhíseolaíoch i measc leanaí agus ógánach<sup>3</sup> agus moltar a bheith i mbun gníomhaíocht choirp de chineál éigin ar bhonn leanúnach<sup>4</sup>. Tá mórthioncar ag timpeallachtaí difriúla ina gcaitheann daoine óga bunús a gcuid ama ar an méid aclaíochta a bhíonn ar bun acu<sup>5</sup>.

#### Treochtaí 1998 – 2002

Idir 1998 agus 2002, tháinig laghdú ó 53.5% go 47.0% ar chéatadán na leanaí a thugann le fios go mbíonn siad i mbun aclaíochta ceithre bhabhta sa tseachtain nó níos minice. Tá idir bhuachaillí agus chailíní i gceist leis an laghdú seo (ó 62.4% go 59.2% i gcás na mbuachaillí agus ó 45.0% go 37.9% i gcás na gcailíní) agus tá gach aoisghrúpa i gceist freisin. Tá an laghdú is suntasaí le sonrú i measc cailíní 12-14 bliana d'aois (ó 49.4% go 42.4%).

### ...Aclaíocht i measc leanaí scoile na hÉireann



*Céatadán na leanaí, de réir aoise agus inscne, a bhíonn i mbun aclaíochta ceithre bhabhta sa tseachtain nó níos minice, HBSC 2002*

### An Aclaíocht a chur i gcomhthéacs

- Is mó seans go mbíonn sé níos éasca do leanaí, a thugann le fios go mbíonn siad i mbun aclaíochta ceithre bhabhta sa tseachtain nó níos minice, labhairt lena n-athair ná mar a bhíonn sé dóibh siúd nach mbíonn an méid céanna aclaíochta ar bun acu (59% vs 48%).
- Is mó seans go gcaitheann leanaí, a thugann le fios go mbíonn siad i mbun aclaíochta ceithre bhabhta sa tseachtain nó níos minice, ceithre thráthnóna nó níos mó lena gcairde ná na leanaí nach mbíonn an méid céanna aclaíochta ar bun acu (55% vs 45%).
- Is mó seans nach mbíonn leanaí, a thugann le fios go mbíonn siad i mbun aclaíochta ceithre bhabhta sa tseachtain nó níos minice, faoi bhrú ag obair bhaile i gcomparáid leis na leanaí nach mbíonn an méid céanna aclaíochta ar bun acu (33% vs 37%).
- Is mó seans go bhfuil leanaí, a chuireann in iúl go mbíonn siad i mbun aclaíochta ceithre bhabhta sa tseachtain nó níos minice – go breá sláintiúil (36% vs 20%) agus go bhfuil siad go sona sásta sa saol (51% vs 38%) ná na leanaí nach mbíonn i mbun aclaíochta chomh minic seo.
- Níl baint ar bith ag cúrsaí aclaíochta leis na rudaí seo a leanas: aicmí sóisialta, an bhfuil cónaí ar an leanbh le beirt tuismitheoirí nó nach bhfuil, an féidir leis an leanbh labhairt go héasca lena m(h)áthair nó lena c(h)ara is fearr.



## ...Aclaíocht i measc leanaí scoile na hÉireann

### Idirnáisiúnta

In HBSC 2002, níor cuireadh an cheist seo i ngach tír; mar sin de, ní féidir comparáid idirnáisiúnta a dhéanamh le haghaidh 2002. Bhí an cheist éigeantach i 1998, áfach, agus dá bhrí sin is féidir comparáid idirnáisiúnta a dhéanamh le haghaidh shuirbhé 1998. Sa bhliain 1998, bhí buachaillí agus cailíní na hÉireann, a bhí 15 bliana d'aois, sa cheathrú háit as 29 tír san Eoraip agus i Meiriceá Thuaidh; mhaígh 42% díobh go raibh siad i mbun aclaíochta ceithre bhabhta sa tseachtain nó níos minice. Sa bhliain 1998, mhaígh 63% de bhuachaillí agus de cailíní na hÉireann 11 bhliain d'aois (sa cheathrú háit as an 29 tír sin), agus 57% de bhuachaillí agus de cailíní na hÉireann 13 bliana d'aois (an ceathrú háit freisin) go raibh siad i mbun aclaíochta ceithre bhabhta sa tseachtain nó níos minice. Beidh treochtaí náisiúnta agus comparáidí idirnáisiúnta um ghníomhaíocht fhisiceach ar fáil in 2006.

### Impleachtaí

Tá laghdú tagtha ó 1998 ar aghaidh ar líon na ndaoine óga in Éirinn a deir go mbíonn siad i mbun aclaíochta ceithre bhabhta sa tseachtain nó níos minice. Ina theannta sin, is féidir a rá gur chéatadán ard a bhí i gceist leis an méid leanaí a bhí i mbun aclaíochta ceithre bhabhta sa tseachtain nó níos minice i gcomparáid le tíortha eile san Eoraip agus i Meiriceá Thuaidh ag an am. Cé nach léiriú iomlán cruinn í an fhaisnéis seo ar chúrsaí faoi láthair, is garmheastachán é ar an rangú idirnáisiúnta. Tugann torthaí na bileoige fíricí seo le fios go bhfuil baint ag aclaíocht leanaí leis an gcaidreamh atá acu lena n-athair agus le leanaí comhaoise. Ina theannta sin, is cosúil go bhfuil baint idir a bheith i mbun aclaíochta agus dearcadh maith a bheith ag daoine i dtaca lena sláinte féin. Cé nach laghdú ollmhór a bhí i gceist, bhí laghdú ar líon na leanaí a bhí i mbun aclaíochta in 2002 agus ní mór monatóireacht a dhéanamh air seo. Baineann tábhacht ar leith leis seo de dheasca na himní i dtaca leis an otracht sa tsochaí. Ní mór tús áite a thabhairt do chás na gcailíní 15-17 mbliana d'aois nach mbíonn ach céatadán beag díobh i mbun aclaíochta. D'fhéadfadh sé go léiríonn an fhaisnéis seo go bhfuil géarghá le háiseanna éagsúla chun aclaíocht a spreagadh i measc daoine óga taobh amuigh den scoil. Ní mór athbhreithniú a dhéanamh ar an méid aclaíochta a dhéantar i rith uaireanta scoile freisin.



## ...Aclaíocht i measc leanaí scoile na hÉireann

### Tagairtí

1. Currie, C., Samdal, O., Boyce, W. & Smith, R. (eagaí) (2001). *Health behaviour in school-aged children: a WHO cross-national study (HBSC): research protocol for 2001/2002 survey*. Dún Éideann: CAHRU, Ollscoil Dhún Éideann.
2. Currie, C., Roberts, C., Morgan, A., Smith, R., Settertobulte, W., Samdal, O. & Barnakov-Rasmussen, V. (eagaí) (2004). *Young people's health in context*. Health Policy for Children and Adolescent No. 4. Cóbanhávan:WHO-Europe.
3. Sallis, J.F., Prochaska, J.J. & Taylor, W.C. (2000). A review of correlates of physical activity of children and adolescents. *Medicine & Science in Sports & Exercise*, 32(5), 963-975.
4. An Roinn Sláinte agus Leanaí (2005). *Obesity – The Policy Changes: The report of the National Taskforce on Obesity*. Baile Átha Cliath: An Roinn Sláinte agus Leanaí.
5. de Roiste, A. & Dineen, J. (2005). *Young People's Views about Opportunities, Barriers and Supports to Recreation and Leisure: A Research Report by Cork Institute of Technology on behalf of the National Children's Office*. Baile Átha Cliath: Brunswick Press.

Staidéar taighde is é an Iompraíocht Sláinte Leanaí na hÉireann a rinne líonra idirnáisiúnta d'fhoirne taighde <sup>1,2</sup> i gcomhar leis an Eagraíocht Dhomhanda Sláinte (Eoraip) agus a chomhordaigh an Dr Candace Currie ó Ollscoil Dhún Éideann. Sa bhliain 2002, rinne HBSC na hÉireann suirbhé ar 8,424 leanbh Éireannach ó scoileanna éagsúla ar fud na tíre.

Tá tuilleadh eolais le fáil ag [www.hbcs.org](http://www.hbcs.org), ag [www.nuiqalway.ie/hbcs](http://www.nuiqalway.ie/hbcs) agus ag [www.hbcs.org/countries/ireland.html](http://www.hbcs.org/countries/ireland.html)

Faigheann HBSC na hÉireann maoiniú ón Aonad um Chothú Sláinte sa Roinn Sláinte agus Leanaí. Fuarthas cúnaimh deontais ón mBord Taighde Sláinte chun an bhileog fíricí seo a chur le chéile. Bhí HBSC na hÉireann ina chuid de Shuirbhéanna Náisiúnta Sláinte agus Nós Maireachtála a stiúraigh an tOllamh Cecily Kelleher. Ba mhaith linn buíochas a ghlacadh leis na leanaí, na múinteoirí agus na scoileanna ar fad a ghlac páirt sa suirbhé agus aitheantas a thabhairt don méid a rinne ár gcomhghleacaithe san Ionad Léinn um Chothú Sláinte, OÉ Gaillimh.



Táimid fíorbhuíoch d'Oifig an Aistriúcháin in OÉG as an obair aistriúcháin ar fad a rinneadh.